

UDHËZIM
Nr. 557, datë 5.7.2018

PËR PËRCAKTIMIN E KRITEREVE/RREGULLAVE PËR PËRZGJEDHJEN E
SUBJEKTIT QË DO TË MARRË TË DREJTËN PËR PRODHIMIN DHE
SHPËRNDARJEN E BILETAVE ELEKTRONIKE PËR TRANSPORTIN RRUGOR

Në zbatim të nenit 102, pika 4, të Kushtetutës së Republikës së Shqipërisë; të nenit 21/2 të ligjit nr. 8308, datë 18.3.1998, “Për transportet rrugore”, të ndryshuar; të pikës 2, 4, 5 të kreut III dhe pikës 3, të kreut IV, të vendimit nr. 85, datë 8.2.2017, të Këshillit të Ministrave, “Për përcaktimin e rregullave për prodhimin, shpërndarjen dhe pajisjen e udhëtarëve me bileta transporti rrugor”,

UDHËZOJ:

1. Qëllimi

Ky udhëzim ka për qëllim përmirësimin në tërësi të ofrimit të shërbimeve të transportit publik dhe lehtësimit të procedurave për përdoruesit dhe përfituesit e këtyre shërbimeve, transparencën në lidhje me përdorimin e këtyre shërbimeve dhe të tarifimit të përdoruesve, modernizimin e sistemit të biletimit të transportit rrugor, si dhe forcimin e kontrollit dhe shmangien e evazionit fiskal.

2. Objekti

Objekti i zbatimit të këtij udhëzimi është përcaktimi i formës së kontraktimit të subjektit, që do të marrë të drejtën për prodhimin dhe shpërndarjen e biletave elektronike, si dhe kriteret për zgjedhëse konkurruese.

3. Përkufizime

“Ministria” është ministria përgjegjëse për transportin.

“Autoritet kontraktues” është ministria përgjegjëse për transportin dhe/ose njësitë e vetëqeverisjes vendore.

4. Forma e dhënies të së drejtës

4.1 Autoritetet kontraktuese do të realizojnë nëpërmjet kontraktimit të subjekteve të treta, administrimin e biletave elektronike dhe sistemin e biletimit elektronik për shërbimet e transportit publik, përkatësisht në linjat e transportit ndërqytetas/ndërkombëtar të udhëtarëve dhe në linjat e transportit qytetas/rrethqytetas të udhëtarëve.

4.2 Forma e kontraktimit të subjekteve të treta është ajo e prokurimit publik ose nëpërmjet koncesionit/partneritetit publik privat, me anë të një procedure për zgjedhëse konkurruese, si pasojë e kërkesës/garës së njoftuar nga autoritetet kontraktuese apo propozimeve të pakërkua nga vetë subjektet, nëpërmjet një procesi të drejtë, transparent, jodiskriminues dhe konkurrues, nga ku ofertuesi i suksesshëm do të ngrejë dhe administrojë sistemin e biletimit elektronik dhe biletat elektronike.

4.3 Autoritetet kontraktuese do të aplikojnë procedurat dhe rregullat e vendosura sipas rastit, të përcaktuara në ligjin nr. 9643, datë 20.11.2006, “Për prokurimin publik”, të ndryshuar; vendimin e Këshillit të Ministrave nr. 914, datë 29.12.2014, “Për miratimin e rregullave të prokurimit publik”, të ndryshuar; si dhe në ligjin nr. 125/2013, datë 25.4.2013, “Për koncesionet dhe partneritetin publik privat”, të ndryshuar; vendimin e Këshillit të Ministrave nr. 575, datë 10.7.2013, “Për miratimin e rregullave për vlerësimin dhe dhënien me koncesion/partneritet publik privat”, të ndryshuar dhe aktet e tjera ligjore dhe nënligjore në fuqi.

5. Kriteret e procedurës për zgjedhëse konkurruese

5.1 Autoritetet kontraktuese përcaktojnë kriteret e procedurës për zgjedhëse konkurruese, në përputhje me legjislationin në fuqi dhe sipas kriterëve specifike të aktivitetit të kërkuar.

5.2 Subjekti duhet të plotësojë kriteret e përgjithshme, si më poshtë:

a) Reputacion të mirë, i cili provohet me anë të vetëdeklarimit për reputacionin e mirë të përfaqësuesit ligjor të subjektit (shtojca 1).

b) Qëndrueshmëri financiare/kapacitetet financiare për të investuar, që provohet me anë të një dokumenti të lëshuar nga një institucion bankar ose financiar, i cili mund të jetë:

i. një dokument/garanci bankare;

ii. një dokument i lëshuar nga shoqëri sigurimi.

Këto dokumente duhet të parashikojnë një vlerë në përputhje me financimin e përcaktuar në planbiznesin e subjektit kërkuar, si dhe duhet të vërtetojnë se banka/shoqëria e sigurimit janë garant për këtë subjekt.

Gjithashtu, do të pranohen dokumente të lëshuara nga çdo bankë, institucion financiar ose institucione të ngarkuara për këtë qëllim në çdo shtet anëtar të BE-së, ku subjekti kërkuar apo filiali i tij është regjistruar.

c) Të ketë eksperiencë të mëparshme të ngjashme dhe ushtrim aktiviteti në Shqipëri apo vende të BE-së.

Për plotësimin e kërkesave të kësaj shkronje, subjekti duhet të paraqesë përshkrimin e kapaciteteve teknike,

organizative dhe profesionale, të shoqëruara me certifikatë, diplomë apo çdo dëshmi në fushën përkatëse.

ç) Të zhvillojë veprimtari tregtare, sipas legjislacionit shqiptar ose person i huaj, i cili ka krijuar një filial ose zyrë përfaqësimi në Shqipëri, sipas legjislacionit në Shqipëri.

Për plotësimin e kërkesave të kësaj shkronje, subjekti duhet:

i. të ketë ambiente, në të cilat ai mban dokumentet kryesore të biznesit, në veçanti dokumentet e kontabilitetit, të personelit, dokumentet që përmbajnë të dhëna në lidhje me llojin dhe sasinë e biletave të emetuara dhe ndonjë dokument tjetër, tek i cili autoritetet kontraktuese duhet të kenë akses, me qëllim verifikimin e përputhjes me kushtet e vendosura në këtë udhëzim dhe aktet e tjera ligjore përkatëse;

ii. të drejtojë efektivisht dhe në vazhdimësi, me pajisje dhe burimet njerëzore të nevojshme, operacionet e saj në lidhje me dokumentet e përmendura në paragrafin “i”, të kësaj shkronje, në një zyrë/qendër operative të vendosur në territorin e Republikës së Shqipërisë.

5.3 Autoritetet kontraktuese mund të verifikojnë zyrtarisht deklaratimet për plotësimin e kushtit të reputacionit të mirë dhe gjendjes gjyqësore, për subjektin dhe drejtuesin ligjor të saj, pranë institucioneve përkatëse sipas kuadrit ligjor në fuqi.

Ky udhëzim hyn në fuqi me botimin në Fletoren Zyrtare.

MINISTRI I INFRASTRUKTURËS
DHE ENERGJISË
Damian Gjilknuri

SHTOJCA 1
VETËDEKLARIM
I PËRFAQËSUESIT LIGJOR TË SUBJEKTIT

Unë i nënshkruari _____, administrator/pronar i subjektit _____, me seli në _____.

Deklaroj në përgjegjësinë time, në njohje të plotë të pasojave që sjell një deklaram i pavërtetë se:

a) Nuk kam asnjë çështje gjyqësore të hapur dhe nuk jam në ndjekje penale nga organet e prokurorisë, nuk jam shpallur fajtor për shkelje të legjislacionit të transportit rrugor (ose në rast se ka, deklaroj: “Kam çështje gjyqësore të hapur në Gjykatën e Rrethit _____ (shoqëruar me motivin e çështjes) apo/dhe kam penalizim (të licencës/lejes/autorizimit etj.) aktuale nr. _____ nga inspektorati/institucioni _____ (shoqëruar me masën dhe motivin e penalizimit)”¹.

b) Subjekti _____ i regjistruar në organet tatimore me NIPT: _____, regjistruar në Regjistrin Kombëtar pranë QKB-së, me nr. _____, datë _____, me objekt veprimtarie aktiviteti për të cilin kërkoj të marrë të drejtën, nuk është në poqes falimentimi, nuk ka asnjë detyrim financiar ndaj të tretëve (Drejtorisë së Përgjithshme e Tatimeve, njësitë e vetëqeverisjes vendore etj.).

c) Jam pajisur me certifikatë, dëshmi etj., lidhur me eksperiencë të mëparshme të ngjashme dhe kompetencë profesionale (nëse disponohet).

Deklaroj që njoh dhe zbatoj ligjin nr. 8308, datë 18.3.1998, “Për transportet rrugore”, të ndryshuar; vendimin e Këshillit të Ministrave nr. 85, datë 8.2.2017, “Për përcaktimin e rregullave për prodhimin, shpërndarjen dhe pajisjen e udhëtarëve me bileta transporti rrugor”; udhëzimin nr. 3743, datë 10.7.2017, “Mbi modelet dhe standardet e biletave të transportit rrugor të udhëtarëve”, të ndryshuar dhe aktet e tjera ligjore dhe nënligjore në fuqi të aplikueshme.

DEKLARUESI

(emër, mbiemër, firmë)

Datë më _____

¹ Kur nuk është e nevojshme hiqet.